







Call. 21









1621

21. *Jan. 1712.*

MANIFESTE

OV

DECLARATION DES
EGLISES REFORMEES DE
France & Souueraineté
de Bearn.

*De l'iniuste persecution qui leur est faicte, par
les ennemis de l'Estat & de leur Religion.
Et de leur legitime & necessaire defence.*

m-
de
lun.



A LA ROCHELLE,

Par Pierre Pié de Dieu.

M. VI. C. XXI.

1231

Case

F

39

326

1621eg

THE NEWBERRY
LIBRARY

MANIFESTE, OV DECLARATION
DES EGLISES RE-
formees de France & Souuerai-
neté de Bearn.

*De l'iniuste persecution qui leur est faicte par
les ennemis de l'Estat & de leur Religion. Et
de leur legitime & necessaire defence.*

NO V S Deputez en l'Assemblée Generale des
Eglises Reformees de France & Souueraineté
de Bearn, persecutees par les ennemis de l'Estat & de
leur Religion, qui abusent des affections & de la con-
science du Roy, voyans qu'à nostre grand regret nous
sommes contraincts par la violence de l'oppression de
recourir aux moyens naturels & legitimes pour conser-
uer, par vne necessaire defence, la liberté de nos con-
sciences & la seureté de nos vies : protestons au nom
desdites Eglises deuant Dieu & les hommes, de demeu-
rer inuiolablement sous la tres-humble subiection &
obeissance de nostre Roy, recognoissans qu'il nous a esté
donné de Dieu pour nostre Souuerain Seigneur. Et à fin
que tout le monde puisse recognoistre que comme ceste
obeissance est, apres le seruice de Dieu le seul but de nos
intentions assez declarees par toutes les actions passees
de nostre fidelité grauee aux colomnes de cet Estat &
aux couronnes de nos derniers Rois releuees par nos
peres & nous conioinctement avec les autres bons

François, de dessous les efforts des factions ennemies: aussi la haine & la persecution que nous souffrons maintenant n'est pour autre cause excitee par nos ennemis, que pour ceste affection veritable & sainte, à laquelle ils nous recognoissent inseparablement attachez par les enseignemens de nostre Religion, l'exemple de nos peres, & les interets de nostre propre conseruation. Nous supplions donc premierement le Roy, & tout ce qu'il y a de bons François, puis tous les Rois, Princes & Potentats, amis & allies de la Couronne, & generalement toutes personnes touchees de zele à la gloire de Dieu, de compassion de l'innocence foulee, & de desplaisir des miseres qui menacent auiourd'huy la France: d'entendre icy nos iustes plainctes, pour voir en icelles la perfidie & cruauté de ceux qui malgré nous les arrachent de nostre sein, & nous obligent de les publier pour la iustification de nostre innocence, & pour enseigner à tous ceux qui aiment la iustice & la verité, que le refuge de la defense à laquelle nous sommes reduits est necessaire & iuste: nos ennemis n'estans poussez d'autre mouvement à mettre le feu dans ce Royaume, que pour esteindre nostre Religion, & pour abbatre la resistance la plus ferme qui se peut opposer dans l'Estat aux entreprises estrangeres. Mais d'autant que par leurs artifices accoustumez, ils ont icy suiuy la route ordinaire à la violence & cruauté qui a de coustume de se faire voye par la calomnie à l'opression d'une iuste cause: & pour pretexte de nous courir sus, ils nous ont publiez rebelles & seditionneux, employans, pour espendre par tout cette accusation, les Edicts & Declaratiōs du Roy & des Parlemens, & la bouche mesme des Ambassadeurs es pays estranges: à fin que la simplicité de ceux qui sont moins informez ou de la haine, ou du pouuoir, ou des artifices

de nos mal-veuillans, ne reçoïue quelque sinistre impres-
 sion de nous, touchant le deuoir d'obeissance & fidelité
 enuers nostre Roy & nostre patrie. Nous ferons voir
 icy que tous les pretextés, les crimes iniurieux qu'on
 nous impose, sont artifices & desguilemens empruntez
 pour seruir de voile aux outrages faicts à l'innocence.
 Ainsi que pour allumer la haine de nos Roys, & la fureur
 des peuples contre l'Euangile, on accusoit iadis les pre-
 miers Chrestiens, & nos peres en ces derniers siecles, de
 semblables crimes. Qu'ils contreuenoyent aux Decrets
 de Cesar, esmouuoient sedition entre les peuples, heur-
 toient la Royauté: & sous ces accusations supposees on
 leur a fait souffrir par tout le monde la rigueur du glai-
 ue, l'ardeur des feux, la cruauté des massacres, la fureur
 des guerres, & l'horreur de toutes sortes de supplices.
 Il est vray que comme nos peres estoient plus espars &
 descouverts ou exposez à vne plus facile boucherie, on
 a imputé directement ces crimes à la religion, & puis on
 les a persecutez, on leur a fait la guerre ouuertement
 pour la profession qu'ils en faisoient. Auïourd'huy par
 vn artifice accommodé à leurs desseins nos ennemis
 changent de methode. Ils declarét la guerre aux person-
 nes pour la faire à la religion. Et pource qu'apres tant de
 perfidies & de cruantez, le bras de Dieu nous ayant rele-
 uez comme des cendres de nos peres, & par vne mira-
 culeuse prosperité du feu Roy, (conduit par la fidelité
 de nous & autres bons François iusques sur le throsne de
 ceste Monarchie) les bresches de l'Estat estans reparees,
 afin d'y establir vne ferme paix, on nous a donné vn Edit
 pour la liberté de nos consciences, & des seuretez pour
 mettre à couuert nos biens & nos vies contre la violen-
 te que les maux passez nous faisoient craindre pour
 l'aduenir: ce seroit certes à present trop apparemment

Act. 17.
7.

violenter la paix, & se declarer trop visiblement ennemis du repos de la France, si on reuoquoit ouuertement l'Edict faict en nostre faueur : si on nous declaroit la guerre pour nostre religion. Ce seroit aussi interesser trop de personnes en vne mesme cause. C'est pourquoy pour couvrir le dessein proietté de la ruine de cet Estat par la nostre, pour armer le Roy contre nous, & pour nous perdre avec plus de facilité qu'on ne croit autrement pouuoir faire : On nous a déclaré rebelles & criminels, on tasche de rendre ceste cause plus particuliere, on appelle la guerre qu'on nous faict vn chastiment de sedition. Mais quand nous aurons exposé icy aux yeux de tout le monde le dessein de ceux qui sont auteurs de ces troubles & confusions : La longue oppression que nous auons soufferte iusques icy en toute patience. L'euidence de nostre iustice au procedé que nous auons tenu enuers nostre Roy en nos plaintes & tres-humbles requestes, qu'on nous impute maintenant à crime : Et finalement la persecution ouuerte qui nous est faite à present par la voye des armes ja leuees contre nous en tous les lieux de ce Royaume, où on estime que nous pouuons faire quelque resistance : Nous esperons que nous mettrons nostre innocence à couuert de ces calomnies, rendrons approuuee la iuste & necessaire defense à laquelle nous auons recours en l'attente du secours & benediction du Tout-puissant : Et nous acquerrons la faueur & l'assistance de tous ceux qui ayment la gloire & la verité & l'ayde & le support de quiconque desire la conseruation & le salut de ce pauvre Royaume.

Dessein
nos en
nos
moy-
d'y
uenir

Depuis que le plus ferme appuy de l'Edict de nostre seureté, estably par la main puissante du feu Roy, tomba par le coup de sa mort, les ennemis de nostre Religion & de la paix publique s'esleuant avec plus d'espe-

rance de progrez & de succez en leurs desseins, conuertirent tous leurs efforts à ietter par terre ce fondement de la tranquillité de l'Estat. Scachans que le plus asseuré moyen de ramener la confusion des troubles & des guerres passées estoit de destruire l'Edict qui les auoit destruites. Mais ne se pouuans promettre que les bonnes inclinations du Roy & la sagesse de la Roynes sa Mere lors Regente, & tout ce qu'il y a de bons François interessez en la paix de ce Royaume, consentissent ou peussent souffrir vne rupture ouuerte de l'Edict: ils ont cherché de gagner en detail ce qu'ils ne pouuoient obtenir en gros: & par artifices & moyens plus couuerts faire tomber les choses dans le precipice auquel ils les ont auourd'huy iettees.

Le premier fondement de leur dessein se recogneut avec estonnement & iuste apprehension de tous les nostres, quand au sacre du Roy on luy fit iurer ce serment. *Je tascheray à mon pouuoir en bonne foy chasser de ma iurisdiction & terres de ma subiection tous heretiques denoncez par l'Eglise.* Comme s'il prenoit sa Couronne sous ceste condition & sous ceste loy qu'il nous extermineroit quand il le pourroit faire. Le sang du Grand Henry crioit encore vengeance du furieux & abominable parricide qui protesta & afferma n'auoir esté induit par autre raison à le tuer, que pour ce qu'il estoit fauteur d'heretiques, qu'il le souffroit en son Royaume, qu'il ne leur faisoit pas la guerre: Et voila qu'on fait promettre à son fils, à son successeur, qu'il employera toute sa puissance à les exterminer. Puissante & efficaceuse raison pour imprimer au cœur d'un Roy, dès ces plus tendres ans, la necessité de nous haïr & de nous destruire, que d'adiouster à la terreur de l'exemple du pere cruellement meurtroy pour auoir maintenu la paix à ceux qu'on appelle here-

tiques, la stipulation de regner & seoir sur le trosne apres luy à la charge de persecuter ceux qu'il auoit conseruez. Car qui ne sçait que sous le nom d'heretiques ils ne veulent entendre que nous? Que nous sommes denoncez & qualifiez tels par le Pape & le Concile de Trente. Et partant si le Roy s'est deu croire obligé à l'observation de ce serment selon leur intention, que n'auons nous deu craindre dès lors? Pourquoy sur l'experience du passé n'auons nous deu apprehender de rechef les malheurs sanglans que telles impressions & necessitez imposees aux consciences des Roys nous ont fait esprouuer? Ce mesme dessein de nos ennemis se manifesta encore ouuertement, quand pour faire passer en loy d'Estat & en maxime vniuerselle de conscience, qu'il ne nous falloit plus souffrir en France? ils obtindrent aux Estats derniers tenus à Paris, que les Chambres du Clergé & de la Noblesse demandassent expressement par leurs cahiers l'execution de ce serment du Roy, & la reception & publication du Concile de Trente. Concile auparauant reietté en plains Estats tenus aux plus sanglans & violens troubles qui ayent esté excitez contre nous dans ce Royaume. Concile qui ne souffre pas que les Roys regnent s'ils donnent vie & liberté en leur domination à ceux qu'il a declarez heretiques.

Mais le plus apparent & le plus sensible progrez du dessein de nos mal-veillans s'est aduancé principalement par les Sermons seditieux des prescheurs Iesuites & autres Moines, qui depuis quelques ans par vne licence effrenee, & vne manifeste coniuration, se permettant contre le respect des Edicts & leur autorité, de prendre à tasche de les suggiller en leurs chaires & les rendre odieux, preschans la fureur & la iedition, nourrissent le peuple à nostre haine, l'instruisent à nous auoir en execration

cration, & luy soufflans la guerre & le meurtre dans l'esprit, le disposent & rendent preparé à toutes occasions de nous mal faire. D'où nous ressentons continuellement tant d'infractions des Edicts de paix, tant de brèches qui sont faictes à nostre seureté, tant de violences à nostre liberté. Neantmoins nous pourrions dire encore iusques-là, que nostre patience auroit surmonté & comme estouffé la pluspart de ces maux, ou du moins esperé que les remedes en fin nous en auroient esté donnez de la bonté du Roy, & de la sagesse de ses plus fideles Confeillers; si les Iesuites ne fussent iamais montez au comble de puissance où ils sont paruenus. Car comme il est notoire que par toutes sortes de moyens violens, ils ont procuré iusques ici l'extirpation de nostre Religion, & la ruine de ceste Monarchie, depuis que leur pouuoir est accreu à l'egal de leur mauuaise volonté, & qu'ils voyent tous obstacles, cy-deuant opposez à ce qu'ils osoient entreprendre, maintenant abbatus ou ceder dessous leur puissance: quelle autre attente nous a esté reseruee que d'experimenter le danger où de si long temps ils proieettoient de nous precipiter? La face miserable de la Chrétienté aujourd'huy presque toute deschiree de guerres & de confusions hortibles, represente assez aux yeux de tout le monde quelle puissance ont eu leurs inductions artificieuses & meschantes à exciter vne guerre de religion tantost vniuerselle. Et qui peut presumer que la France (à laquelle ils ont desia tant de fois fait ressentir de si funestes playes de leurs mains meurtrieres) estant auourd huy liuree entre leurs mains & comme sous leur gouvernement absolu, pût seule esuiter l'accident commun qu'ils ont fait tomber sur les autres Estats ou leur credit & la diuersité de religion leur ont donné pre-texte & matiere de mettre le trouble. Il n'y a eu person-

ne si peu instruite en leurs desseins qui n'ait cy-deuant preueu ou predit la misere & ruine de la France deuor arriuer lors que les conseils des Iesuites y auroient le dessus. Et maintenant que d'un costé on les void en ce haut credit, & d'autre costé la France reduitte aux malheurs d'une guerre ciuile: y auroit-il quelqu'un si auengle qui n'y recogneust l'œuvre de leurs mains? qui en voulut chercher vne autre cause ou vn autre origine? La crainte de tomber en ces maux nous a fait ouyr plusieurs aduertissemens des plus sages Catholiques & mieux affectionnez François qui s'y sont long temps opposez de toute leur puissance. La vertu du Parlement de Paris à plusieurs fois opposé son autorité à leurs entreprises. Et les enseignemens remarquables, que son iugement respendit par toute la France, peu apres la mort du feu Roy, du danger & des pernicieuses consequences à l'Estat s'ils empietoient vn plus grand credit, guiderent la sagesse de la Royne Mere du Roy, pour ne laisser prendre plus de pied à leur audace dans la Cour & au manienment des affaires. Ce qu'ils n'ont iamais peu durant sa regence, & l'autorité qu'elle a eu en la conduite de l'Estat.

ir Mais comme tous changemens sont propres à ceux
 - qui cherchent occasion de progrez, ayans rencontré au
 - gouvernement suiuant vn plus fauorable support, com-
 - me ils sont accorts à debiter l'vtilité de leur ministere,
 - aydez de l'occasion, & soustenus par ceste main, se sont
 esleuez sur le pinacle du pouuoir ou nous les voyons
 estre montez. On vid lors le Iesuite le plus audacieux
 qui soit en toute la Societé introduict dans le Louure: &
 d'une temerité sans exemple se placer dans le logis de la
 sacree personne du Roy, afin d'auoir toutes les heures &
 les moments de le gouverner en sa puissance. Et de là en

auant à paru au gouvernement de l'Estat, quel pouuoir ont pris les Iesuites dessus les volontez du Roy. Par deux remarquables coups deffay : aussi tost apres l'introduction de ce Iesuite, on put recognoistre que desormais rien ne seroit impossible à ceux de sa Societé de tout ce qu'ils voudroient entreprendre, pour eux, ou contre nous. La necessité de ce discours requiert que nous les representations.

Toute la France se peut souuenir que trois iours apres que ce Iesuite eut l'oreille du Roy, ils firent casser dans son Conseil l'Arrest du Parlement, par lequel l'ouuerture de leur College dans Paris leur estoit interdite, iusqu'à ce qu'ils eussent ouuertement renoncé aux maximes de la ruine des Estats & du meurtre des Roys Et pour monstrier que toute opposition à leur violence seroit desormais vaine, firent par vn Arrest du Conseil (par eux affiché à tous les carrefours de Paris en signe de triomphe) casser les Decrets de l'Vniuersité qui leur auroit voulu faire quelque resistance. De mesme facilité & en mesme temps ils firent donner l'Arrest en faueur des Euesques de Bearn le 25. de iuin 1617. pour la main leuee des biens Ecclesiastiques du pays, affectuez par establissement solennel, arresté par le Souuerain & les Estats, à l'entretien de nos Pasteurs, Colege, Garnisons, Officiers & autres charges dudit pays. Quinze ans durant les Euesques auoient fait ceste poursuite avec toute sorte d'instance. Le feu Roy sollicité de Rome à diuerses fois en leur faueur, scachant les consequences d'vn tel changement, obligé aussi par son serment propre à ne rien innouer (outre la liberté de l'exercice donnée aux Catholiques Romains & la restitution d'autant de biens Ecclesiastiques qu'il leur estoit necessaire, accordée par Edit & executée dès l'an 1609.) les en auoit

toujours refusez. La Royne Mere du Roy pour sem-
 blables considerations & pour l'obligation de pareil ser-
 ment iuré par la M. à present regnante pour l'entretien
 de l'establissement ancien (confirmé d'ailleurs par dou-
 ze patentes & Declarations obtenues contre l'instance
 que les Euesques faisoient du contraire) n'y voulut point
 toucher. Le dessein de nos ennemis ne pouuoit receuoir
 plus d'auancement que par vn coup de ceste nature. Car
 ils scauoient que l'execution de ceste main-leuee entrain-
 neroit (comme helas/il est arriué) la subuersion du pays,
 & la ruine totale de nostre religion en iceluy, avec espe-
 rance que du feu qu'ils y allumeroient ils embraleroient
 toute la France. C'est pourquoy ils engagerent le Roy
 par la conscience, & par la leçon de son serment tou-
 chant l'extirpation de nostre Religion, à faire donner
 cest Arrest d'autorité absoluë. Duquel pour ceste cau-
 se (quoy que donné precipitamment sans prendre aduis
 des principaux Officiers de la couronne & Ministres de
 l'Estat en vn faict de tel, e consequence, & contre les for-
 malitez de iustice sur la seule poursuite des Euesques,
 sans ouïr les Deputéz du pays) on n'a iamais peu obtenir
 la reuocation, nonobstant toutes remonstrances & sup-
 plications qui en ayent esté depuis presentees, ausquel-
 les on n'a rien respondu, sinon que l'autorité & la con-
 science du Roy y estoient engagees. Or de là prisme
 nous vne triste experience des mouuemens du Roy és
 affaires plus importantes à son Estat & à nostre conser-
 uation, voyant que ce Iesuite tenoit toutes ses affections
 liees par des respects de religion, & que la deuotion à la-
 quelle sa Majesté par vne bonté nee avec elle est natu-
 rellement portee, estoit comme vn ressort à sa conscien-
 ce, par lequel il encline toutes ses volonteés à ce que bon
 luy semble. Il s'est estably pour conseil de la conscience

du Roy comme il parle. Et en ce conseil peut-il proposer autres maximes que celles des anciens ennemis de cest Estat? qui toutes se peuuent reduire à ce sommaire de la subuersion d'iceluy & de nostre ruine. Luy donne pour loy la decision du Concile de Constance : *Qu'on ne doit point garder la foy aux heretiques.* Que quelques Edicts qu'il ait faits ou iurez ne l'obligent point. Que partant il peut, ains qu'il les doit rompre; où pour l'induire il ne lui repete autre leçon que celle du serment de son sacre. Ne luy propose vn plus grand merite pour le loyer du paradis que l'extirpation des heretiques. L'incite à rechercher par là vn renom plus glorieux que celui de S. Louys pour auoir fait la guerre aux infideles. Tels & semblables sont les conseils de conscience de ce Iesuite. Ausquels sa Majesté, postposant toutes autres considerations de son Estat. s'est laissée persuader; & à dit souuent, *Qu'il vaut mieux perdre son Estat que son ame*, Comme enseignée à tenir pour maxime qu'il y a des occasions de sauuer son ame en perdant son Estat. Or de la possession des volontez du Roy encloses de ceste sorte en la main des Iesuites, ils ont entraîné à eux par vne suite necessaire tout le gouuernement de l'Estat. Ce qu'ils ont obtenu avec tant plus de facilité que tous les sages & anciens Conseillers & Ministres qui ont fidelement serui le feu Roy & la France, à establir & maintenir la prosperité & grandeur ou elle s'est veüe esleuee sous son regne, estans maintenant comme nous voyons reculez de tout maniere des affaires: ceux à qui l'abondante faueur du Roy donne toute l'autorité au gouuernement consent volontairement que la conduite du conseil soit entre les mains de quelques supposts de Rome, Cardinaux & Euesques. Et ceux qui y sont demeurez ou qu'on y a introduits de nouveau, les vns nourris du levain des

vielles factions & affections d'Espagne, les autres gagnent par les aduantages des liberalitez de celle-cy, ou des honneurs de Rome (dont les Iesuites sont principaux banquiers) concourent tous en vn mesme consentement, où il y va de la destruction de tout ce que le feu Roy auoit estably, mais principalement en ce qui nous concerne. Et ces allechemens ont eut tant de force que tel de qui les meilleurs auoient attendu vne inuariable vertu à l'affection de la paix & des bonnes maximes, par l'esperance d'une grandeur Ecclesiastique semble s'estre deuouïé pour instrument de la premiere breche, par laquelle la persecution à couru sur nous. D'autre costé les Cours souueraines & subalternes, & toutes les Magistratures du Royaume sont remplies de personnes qui leur sont asservies, ou par superstition, ou par interest de fortune. Les peuples ne suivent autres mouuements que ceux où ils les portent par leurs predications, ou par leurs confessions secretes.

Les
uuis
itte-
s qui
usons
ts.
Telle estant donc la puissance de nos ennemis, nous en auons aussi, à nostre dommage, resenty les effects par vn traitement tout contraire à celuy que nous auions deffous le feu Roy. Car depuis qu'ils ont ceste autorité (nous pourriõs dire depuis leur regne) il ny a plus de faueur ny d'accez à la Cour pour ceux de nostre Religion. Plusieurs à qui les seruices de leurs peres & les leurs auoient conserué iusques là l'honneur de quelque charge pres du Roy, s'en sont veus reculez. La plus part sont obligez à s'en deffaire sous ce commandement. *Changez de Religion ou quittez vostre charge.* On leur dit que le Roy ne peut voir de bon œil les Huguenots aupres de sa personne. Nous auons dans le Conseil nos plus animees parties pour iuges, & ennemis iurez ceux que nous allons supplier. Nous sommes exclus d'entrer aux charges

dans toutes les Cours Souueraines ou subalternes contre la liberté des Edicts. Si quelqu'un de ceux qui en sont ja pourueus se range à nostre Religion, les Procureurs generaux ou leurs substituts s'opposent à sa seance. Les Chambres luy contestent & les repoussent. Et combien y en a-il és Cours de Parlement de Paris & ailleurs, qui sont retenus de venir à nous par l'oppression de ceste liberté? Mais quand aurions-nous raconté toutes les sortes d'iniures qui nous sont faictes? Les insolences seditieuses qui se commettent iournellement pour empescher l'exercice libre de nostre Religion és lieux où il nous est permis. Les attentats & entreprises contre les places qui nous ont esté baillees en garde pour nostre seureté. Les pratiques secretes pour desbaucher les Gouverneurs d'icelles, comme il est arriué de nouveau és personnes des Gouverneurs de Clermont de Lodeue & d'Argenton. La restitution de ces places à laquelle on nous refuse de pourvoir. Les excez & outrages que souffrent és villes & aux champs ceux de nostre Religion par la fureur du peuple excité par ses Predicateurs. Les rauages & bruslemens de nos Temples & cimetieres. Les inhumanitez exercees au detterment de nos morts, ou pour leur empescher la sepulture. Les violences faictes aux consciences des malades, mesme en l'agonie de la mort, pour les contraindre de renoncer à leur religion. La cruauté exercee contre les pauvres & malades qu'on iette hors des hospitaux. La force practiquee en l'enleuement de nos enfans pour les nourrir en la Religion Romaine, contre l'intention de leurs peres & de leur derniere volonté. Bref toutes manieres de torts & de violences nous sont faictes contre l'authorité du Roy, repos & tranquillité publique. En tous ces maux nostre seul recours est en nos plaintes, que nous additions

continuellement aux Magistrats, ou dans les Prouinces, ou dans les Cours Souueraines. Mais c'est helas ! ou au lieu de remede nous trouuons le poison. Car non seulement nous sommes renuoyez sans obtenir droict sur nos requestes; mais l'iniustice de laquelle ils s'aggrauent l'iniure precedente, augmente l'audace de ceux qui nous ont fait le mal, encouragez par l'impunité & par la loy qu'ils prennent de l'exemple des iuges mesmes.

*procedé
enu par
ous en
os plai-
es qu'on
ous im-
ute an-
our-
phuy à
rime.*

Nostre dernier refuge est en la iustice du Roy & vers les Ministres de l'Estat, où comme pour l'insupportable traitement que nous receuons de tous endroits, nous recourons ainsi qu'à nostre asyle: aussi est-ce d'où nos ennemis font le plus violent effort de nous empescher l'accez. Ils voyent que la protection du Roy nous tient droit couuerts contre toutes leurs iniures. Ils sçauent que la voye de nos plainctes, que la nature ouure à vn chacun, nous conduiroit sous l'abry de sa iustice, où nostre repos & la tranquillité publique seroient conseruez. Pour ceste cause nous experimentons d'eux en cest endroit vne plus animeuse coniuration. Car non seulement ils bouschent l'oreille de sa Majesté & nous ferment toute entree vers elle, mais lors que nous y voulons aller par nos tres-humbles supplications & requestes, ils nous tendent, par vne fraude plus que diabolique, le laqs de leur calomnie pour nous faire tomber au blasme d'une pretenduë rebellion & desobeissance. Ils changent nos plaintes en crimes, ils nous appellent seditieux & rebelles. C'est l'accusation pour laquelle ils nous poursuient criminellement. C'est l'accusation pour laquelle ils nous persecutent aujourd'huy. Nous appellôs ici le Ciel & la terre à tesmoin entre nos ennemis & nous, desirans que la procedure de nos plainctes enuers sa Majesté, que nous exposerons ici veritablemēt

& au

& au long, estant recogneuë de tous, on iuge de nostre innocence, & de la calomnie de l'accusation, & finalement de l'iniuste guerre & persecution que nos haineux nous ont suscitée sous ce pretexte.

Afin d'entretenir l'Edict de paix & reparer les infractions d'iceluy, le feu Roy voulut, selon son equité establir vn ordre au milieu de nous, par lequel nous pourrions de temps en temps, sous sa permission & octroy, nous assembler par Deputez de toutes les Prouinces, pour luy presenter nos plaintes sur les griefs qui nous seroient faits, & remporter de sa bonté les responcez raisonnables & necessaires pour l'entretienement des Edits. Suiuant cet ordre ressentans vne plus pressante necessité que iamais, nous estans adressez à sa Majesté par nos Deputez generaux en l'année 1619. elle eut agreable d'octroyer à nostre tres-humble requeste vn breuet, portant permission de nous Assembler en la ville de Loudun au 25. de Septembre. Où nous estans trouuez de toutes les Prouinces du Royaume & de la Souueraineté de Bearn, les cahiers de nos plaintes estans dressés, nous les presentasmes en toute humilité à sa Majesté, la suppliât que par vne fauorable responce aux principaux articles & plus importants griefs, nous peussions remporter dans toutes les Prouinces, par les tesmoignages de sa bonne volonté à nostre protection, dequoy rassurer tous ses suiets de la Religio, contre tant de menaces & de craintes dont ils se voyët enuironnez. Ce ne seroit iamais fait si nous voulions estaller icy le suiet de toutes ces plaintes. Nous en toucherons seulement quelques vnes pour en faire voir l'importance, & la necessité d'obtenir sur icelles vne prompte iustice.

*Assemblée de
Loudun.*

Nous nous plaignons que Leytoure place de seureté nous auoit esté rauie d'entre les mains. Que deux des no-

stres pourueus d'offices de Cōseillers en la Cour de Par-
 lement de Paris, n'auoyent peu obtenir leur reception
 durant quatre ans continus qu'ils la poursuuoient. Que
 l'exercice de nostre Religion banni de Clermont de Lo-
 deue place de seureté, sur le reestablissemēt d'iceluy pour-
 suivi par nous, on s'estoit opposé avec armes à l'execu-
 tion d'un Arrest du Conseil du Roy. Que nos Temples
 auoiet esté bruslez ou demolis à Bourg en Bresse, à Mou-
 lins en Bourbonnois, & à Leual pres Guise. Qu'à Baux
 en Prouence, le sieur de Vere Capitaine du Chasteau a-
 pres plusieurs menaces & violences, pour defendre &
 empescher l'exercice à ceux de la Religion, les auroit fi-
 nalement chassiez hors de la ville par force, & avec main
 armee le 8. Feurier 1620. Qu'on n'auoit peu obtenir iu-
 stice des excez outrageux faits à quelques vns de la Reli-
 gion à Baugenci & du toxin sonné sur eux, & de ce que
 les coupables qui auoient precipité deux hommes du
 haut du grenier, & percé l'un à coups d'espee, ont esté
 ouys en tesmoignage aux informations qui ont esté fai-
 tes par le Lieutenant general en la iustice d'Orleans, &
 que nonobstant le renuoy de la cause au Parlement de
 Paris, l'on n'a tenu compte d'en faire poursuite. Que
 nos Pasteurs auoient esté chassiez violemment hors des
 villes de Bourges & de la Chasteigneraye. Que plusieurs
 personnes faisans profession de la Religion à Chaalons
 sur Saonne en auroient esté chassées & exilées, comme
 aussi du Duché de Barrois. Que les lieux à nous accordez
 pour l'exercice de la Religion pres des villes de Lyon,
 Dijon & Langres nous estoient empeschez. Qu'és lieux
 où les habitans sont en possession d'y faire ledit exercice
 depuis les annees 1596. 1597. où partant ils ont par l'Edict
 toute liberté, ils y sont troublez, comme à la Chasteigne-
 raye, à la Chastre, à S. Cyprian, la Herle, Velus, Maussac,

Langon, Bourg de Condé en Normandie, à Agiene en Viuarets, à S. Marcelin en Forest, à Chaulme en Xaintonge par opposition formelle des Officiers, à Florence Picusquè, Montfort & Puget par les Consuls, près la ville de Perigueux, à Montignac Charente par sentence du Seneschal d'Angoumois sur peine de mille liures. Que l'education des enfans estoit ostee aux peres de la Religion pour les instruire autrement, comme au sieur le Maistre Me. des Comptes à Paris, & par Arrest de la Cour de Parlement de Roüen, en la cause d'un nommé Couurechef. Que plusieurs enfans de la Religion auroient esté enleuez par des Moynes. Comme à Ambrun le fils d'un bourgeois, à Millaud le fils du sieur Valette, à Leytoure un enfant aagé de dix ans nommé François Aram par le Iesuite Regour le 4. Ianuier 1620. Que nos sepulchres estoient inhumainement violez, où les sepultures empeschees en plusieurs lieux, comme à Aix en Prouence, à Gordes, à Mirabeau, à Ongle, à Xaintes, à S. Georges d'Oleron, & en plusieurs lieux de la Guyenne & autres endroits, avec cruauté & barbarie. Que nos pauures malades estoient chassez des Hospitaux, ou forcez contre leurs consciences, comme en la derniere contagion à Paris, en l'Hospital S. Louys, où plusieurs y furent violentez, & tout accez denié aux Ministres & anciens pour les consoler. Que les Parlemens au preiudice des Chambres establies s'attribuoyent la cognoissance de nos causes, comme le Parlement de Bourdeaux plusieurs fois, & particulièrement au fait des habitans du Mas d'Aginois, qui en ont souffert de tresgrandes vexations, dont plusieurs d'iceux sont morts en prison. Mais principalement és causes criminelles, comme le Parlement de Thoulouse, lequel ayant condamné Iean de Nasses Greffier de Montauban à l'amande honorable,

Il a voulu deſerer aux Arreſts du Conſeil, portans renuoy en la Chambre de Caſtres. Et encor ledit Parlement de Bordeaux en la cauſe des habitans de Tartas, qui en la ſurpriſe du Chateau ayans eſté cruellement traittez, outragez & chaffeز, auroient eſté poursuiuis & mal menez audit Parlement, lequel ſur la reſcrimination des mutins & ſeditieux auroit retenu la cognoiſſance de la cauſe au preiudice de la Chambre de Nerac. Au Parlement d'Aix quantité des noſtres auroient eſté cruellement retenus en priſon pluſieurs annees, nonobſtant leurs cauſes renuoyees & retenuës en la Chambre de Grenoble ſuyuant l'Edict. Nous demandions encore que le changemēt fait és villes de Montault, Vareilles, Tarascon, Mōtgailard au Comté de Foix (eſquelles rien ne doit eſtre innoué ſuyuant le breuet de 1598.) fuſt reparé. Qu'il pleuſt au Roy nous octroyer le breuet de la garde des places de ſeureté, avec la deliurance de l'Eſtat des places de Dauphiné. Faire reuocquer l'Arreſt de main lēuee des biens Eccleſiaſtiques de Bearn. Faire rendre la ville de Priuas entre les mains des habitans, & leur rendre iuſtice ſur les exceز, violences & outrages qu'on leur auoit faits. Outre vne infinité d'autres plaintes publiques & particulieres, trop longues à deduire. En toutes leſquelles nous eſprouaſmes le pouuoir de nos ennemis ſi grand, que toute iuſtice nous y fut deniee, & ne remportaſmes pour toute reſponſe qu'vn commandement abſolu de nous ſeparer.

Mais comme l'vrgence du mal & la neceſſité du remede nous fit recourir pluſieurs fois vers ſa Maieſté, Nos haineux commencerent lors de qualifier noſtre inſtance & tres-humble ſupplication reiteree, du tiltre de rebellion, pour nous oſter l'eſperance de toute iuſtice, pour nous rendre odieux, & pour ouurir la porte à vne

guerre & persecution, obtindrent de faire publier vne
 commination de crime contre nous (comme si c'estoit
 crime que de se plaindre) menaçant tout haut nostre
 perseuerance, des armes du Roy; & faisans verifier ex-
 traordinairement des Edits burdeaux dans les Parlemens
 pour la necessité des preparatifs à nous faire la guerre. Le
 Roy neantmoins par la bonté de son naturel & la force
 de son inclination à iustice, eschappant aux contraintes
 de nos ennemis, nous fit promettre par la bouche de
 Monseigneur le Prince & de Monsieur de Luynes à pre-
 sent Connestable, qui donnerent leur parole à Messieurs
 de Lefdiguieres & de Chastillon pour nous en assurer.
 Qu'apres nostre separation dedans le terme de six mois
 du iour d'icelle, la ville de Leytoure nous seroit rendue,
 les Conseillers receus au Parlement de Paris; le breuet
 de la garde des places de seureté & l'estat de celles de
 Dauphiné nous seroient deliurez. Et le surplus de nos
 cahiers respondus fauorablement, & les responses exe-
 cutes de bonne foy, & que dans sept mois du iour de la
 separation, les Deputez de Bearn seroyent ouys sur ce
 qu'ils voudroient remonstrier à sa Majesté. Et en cas que
 ces promesses ne fussent executees dans le temps, nous
 pourrions nous retrouver ensemble pour demander de-
 rechef à sa Majesté iustice sur nos plaintes. Or d'autant
 que de la condition de ces promesses, des assurances
 sous lesquelles on nous les fit valoir, & de la bonne foy
 promise en l'execution d'icelles despend la iustification
 principale de nostre procedé suivant, pour lequel nous
 sommes iniustement declarez criminels & traitez par la
 rigueur des armes: Que tout le monde voye ici sur quel
 fondement a esté appuyee la bonne foy en laquelle nous
 sommes, & le droict que nous auons eu de nous r'assem-
 bler. Pour confirmation de la promesse qui nous en fut

*Promes-
 ses don-
 nees à
 Loundun
 avec per-
 mission de
 se rassem-
 bler dās
 six mois
 en cas
 d'inexe-
 cution
 d'icelles.*

faite, on nous representoit que c'estoit la premiere parole que le Roy eust donné à ses suiets de la Religion, depuis qu'il tient le gouuernail de son Estat. Monsieur le Connestable adioustoit que la sienne y interuenue nous vaudroit breuets, & peut estre encor dauantage. Le Roy de sa propre bouche le confirma depuis à Fontainebleau aux Deputez qui l'aduertirent de nostre separation, en presence de Monsieur le Duc de Lesdiguières qui nous en auoit donné l'assurance. Or nous eust-il esté loisible de desirer ou de nous figurer quelque autre permission plus valable que la sacree parole du Roy, la premiere qu'il nous eust donnée? Le papier & l'ancre ne peuvent adiouster de poids ny d'autorité aux paroles des Rois. Et certainement nous eussions creu estre indignes de la grace de nostre Roy, & iniurieux à son autorité si nous eussions requis ceste permission sous yne plus grande seureté que sa parole. Ainsi nous estans separez le 13. d'Auril. de l'année dernière, après vn acte dressé entre nous de nostre obéissance, contenant toutes les conditions & promesses susdictes, avec ordre donné à ceux de la Rochelle de faire la conuocation, le cas estant escheu, au lieu qu'ils iugeroiēt le plus commode. Les Deputez se retirans retirez & ayans rendu compte dans les Prouinces, furent continuez, ou d'autres subdeleguez à eux, pour se retrouver ensemble, en cas d'inexécution des choses accordées, suivant la condition des promesses. Cela s'est fait en toutes les Prouinces publiquement au sceu de sa M. & de Messieurs de son Conseil. On ne la point trouuée mauuais. Le Roy ne fit aucune Declaration contraire. Cependant il est tres-certain que s'il y auoit eu quelque entreprise ou attentat contre l'autorité du Roy, ce seroit en la nomination des Deputez, mais comme elle estoit recogneuë legitime par la permission, la condition

pendente aussi nos Deputez generaux faïsans la poursuite de l'exécution des choses promises, n'ont point fait de doute de l'accompagner tousiours de ceste remonstrance vers Messieurs du Conseil. *Faites nous iustice & ne nous donnez point la peine de nous rassembler.* Monseigneur le Prince mesme eïtant allé plusieurs fois au Parlement pour y faire veriffier la iussion du Roy sur la reception des Conseillers, leur representa la permission de nous rassembler, à quoy par leurs refus ils donnoient occasion.

Or le temps prefix des six mois pour l'accomplissement des promesses escheât au treizième d'Octobre sans qu'elles eussent sorti effect, le Roy s'estant acheminé en Guyenne au mois de Septembre, fut sollicité par nos ennemis de faire inionctiō à ceux de Bearn d'executer la main-leuee, & au Parlement de Pau, d'en verifier l'Arrest. Le terme accordé pour leurs remonstrances, que sa Majesté auoit promis d'entendre par la bouche de leurs Deputez, s'estendoit iusques au treiziesme de Novembre; Ce qui fit que sur la iussion du Roy, le Parlement de Pau donna Arrest, par lequel il ordonna que les Deputez feroient leurs remonstrances à sa Majesté dans le temps qui leur estoit accordé (confirmé derechef par lettre escrite le 21. Septembre par sa M. au dit Parlement) autrement le dict temps passé l'Arrest de main-leuee demeureroit verifié. Sa M. non contente de cet Arrest & sans attendre les remonstrances de ceux du pays, est poussé par nos ennemis à s'y acheminer. Et nonobstant que le Parlement par autre Arrest de verification pure & simple eust preueni la venue de sa M. elle ne laissa pas par l'inductiō de nos haineux d'entrer dans le pays avec son armee. Nous nous tairions icy volontiers de la desloyauté de nos ennemis, & des cruautéz y exercees par leurs inductiōs. Si leurs accusations calomnieuses & la douleur

*Execu-
tiō de la
main le-
uee en
Bearn
tirée,
& le cha-
gement
fait au
pays en
la seure-
té & li-
berté de
la religiō*

cuisante de nos miseres ne nous obligeroient maintenant d'auoir la bouche ouuerte pour nostre iustification, & pour en crier vengeance deuant Dieu & les hommes. Nous ne parlons point du changement fait au pays par l'vniõ à la Couronne de France, encore qu'il soit euident qu'elle n'a pas tant esté faite par aucun aduantage de la France, que pour donner plus de lieu à l'alteration de nostre Religion. Nous toucherons seulement en peu de mots ce qui a esté fait directement pour y ruiner la liberté de nostre Religion. Le Roy donc estant à Nauarrenx, & voulant conseruer au sieur de Sales la promesse qu'il luy auoit fait donner dès Bourdeaux, & confirmée dans le pays, de le maintenir au Gouuernement de la ville, à ce conuié encore par les longs seruices dudit sieur de Sales, & par la prõpte obeissãce qu'il tesmoignoit par toutes sortes de deuoirs à sa M. nonobstant ce, pressé par nos ennemis de luy oster le Gouuernement & le donner à vn d'autre Religion, mais retenu par la Religion de ses promesses, le Iesuite qui est aupres de luy interposât son cõseil de cõscience (ou plüstoit sans cõscience) persuada à sa M. qu'il luy estoit loisible de fausser sa promesse, par vn equiuoque & distinctiõ vrayemēt digne de l'indignation de Dieu & des hõmes. *Vostre promesse, dit-il, Sire, est d'Estat ou de conscience. De conscience, dit-il, elle ne peut, car elle est contraire au bien de l'Eglise: Estant donc d'Estat, vostre Majesté doit croire ses Conseillers, qui luy remonstrent que pour le bien de son seruice il importe que cette place ne soit plus entre les mains d'un Huguenot.* Ainsi le Roy induit par le Maistre de sa conscience, qui se fait garand pour luy enuers Dieu de tout ce qu'il fera par son conseil, fit commandement, au sieur de Sales de se demettre de son gouuernement, donné à l'instant au sieur de Poyane ennemy iuré de ceux de nostre Religion. Puis ayant fait retirer la garnison de la ville,

ville, & defarmé les habitans, il y fut mis quatre cens soldats à sa deuotion, sous le commandement dudit sieur de Poyane. Cela fait pour oster tout ce qui restoit de seureté à ceux de la Religion, les six Capitaines des Par-
sans furent cassez, & les villes de Sauueterre, Orthez, Oleron & Nay remplies de garnisons. Le Roy estant de retour à Pau, donna la presidence aux Euesques dans les Estats y conuoquez, pour leur donner par ce moyen l'autorité principale dans le pays. Et Dieu veuille qu'il n'experimente encore d'eux la mesme perfidie qui en chassa son pere en son enfance. Et que les pratiques de l'ennemy voisin ne trouuēt en eux la facilité à luy donner l'ac-
cez dans la France par ceste porte, où la fidelité des nostres a tousiours serui de rempart. Or afin qu'il ne restast rien où la seureté & liberté de nostre Religion ne fussent violees, les Iesuites furent faits maistres de tous les Temples où s'en faisoit l'exercice, quoy que la condition de la main leuee mesme portast ceste reserue, que les temples demeureroient aux nostres tandis qu'il leur en seroit pourueu d'ailleurs. Tous ces changemens se faisans en haine de nostre religion & comme pour la bannir hors du pays, l'audace de tous ceux qui sont nourris & incitez continuellement à nous mal faire, en creut de telle sorte, qu'au lieu que le respect de la presence du Roy les deuoit retenir, leur licence au contraire desborda si auant, qu'en tous les lieux où ils mirent le pied, nos temples ne peurent estre garantis d'infinis rauages & scandales, iusques-là que dedans Pau mesme (le Roy y estant) ayant brisé la chaire & les bancs du Temple, on y brussa publiquement la Bible & le Nouveau Testament. Les Ministres en diuers lieux furent outragez, & plusieurs personnes contraintes contre leurs consciences à s'agenouïller aux processions. Le surplus des insolences, vio-

lences & excez que ce pauvre pays ressentit est innombrable, & tel que les plus cruels ennemis auroient peu exercer au milieu d'une terre conquise. Là dessus pour triomphe, Arnoux fait vn liure intitulé, *Le Roy en Bearn*, où ne se pouuant tenir de ioye de voir ses desseins si auancez, donne clairement à cognoistre iusqu'où il pretend qu'ils se doiuent estendre. Nous enseigne quelle suite nous en deuons attendre. Le Roy à son compte ne doit cesser iusqu'à ce qu'il ait esteint la Religion qu'il abhorre. Et le haut esleuant, pour ce commencement & pour la suite du dessein, au dessus du feu Roy son Pere, laisse à soubz entendre que la mort de ce bon Roy luy ayant esté aduancee pour le refus qu'il auoit fait d'en venir iusques-là : Sa Majesté doit aujourd'huy attendre d'eux vn plus fauorable traitement à la charge de continuer.

Le Bearn reduit en ce miserable Estat, le Roy s'en retournant laissa vne partie de son armée en Guyenne, & espendit le reste par le Poictou, remplissant toutes nos Eglises d'effroy. Et de là en auant on n'oït parler que de la ruine des Huguenots. Tout le discours de la Cour n'est que du siege de la Rochelle. On dit qu'il n'y en a pas pour trois mois, qu'on n'attend plus que la saison commode. Cependant toutes les promesses faictes à Loudun estans negligees, le temps passé sans qu'il y en eust rien d'accompli (hors la deliurance du breuet de la garde des places, car la reception des deux Conseillers a esté quelques mois depuis) quelque instance qu'en eussent faicte nos Deputez generaux durant tout ce temps; la conuocation des Deputez nommez par les Prouinces (& obligez de se reünir pour représenter leurs requestes à sa Majesté sur l'inexecutivn des choses promises) se fait par la ville de la Rochelle qui les y assigne au 25. de Novembre. Nous ne voulons point obmettre qu'apres les

changemens faits au Bearn, la ville de Leytoure fut remise à vn Gentil-homme de la Religion, mais nous remettons à iuger à toutes personnes equitables si vne garnison Catholique y ayant esté laissée, & contre l'ordre du gouuernement precedent de la ville, vn Lieutenant establi, lequel mesme n'a iamais eu approbation du Synode de la Prouince, suiuant le desir du breuet du Roy, de la garde des places de seureté: la bonne foy a esté obseruee en ce poinct, comme elle y auoit esté promise. Nous remettons à iuger encore, si apres que toutes les seuretez d'un pays nous ont esté arrachees, ce chef des promesses executé de la sorte & tous les autres negligez & demeurez sans accomplissement, le droict de nous plaindre d'une contrauention si manifeste, & de ces nouveaux griefs si cuisans, & de tous les autres qui restoient, a cessé, si la necessité en est diminuee, & si l'accez & la liberté nous en ont deu estre interdits. Telle estant donc l'importance des raisons de nous r'assembler, & de recourir promptement en toute humilité à la iustice du Roy, comme nous en auons permission, neantmoins à peine estions nous encores tous rendus en cel lieu, qu'on fit publier vne Declaration pour nous rendre criminels, denonçant ire & iugement de condamnation contre les conuoquans & les conuoquez. Mais cependant autant que nous sentons que le mal nous presse, que nos consciences nous interpellent d'accomplir la charge que nos Eglises nous auoient donnees; que nous y auons en sincerité le tesmoignage de proceder avec iustice. Nous nous mettons en deuoir de presenter au Roy nos tres-humbles remonstrances pour nous purger des fausses accusations & des crimes dont, nos ennemis nous chargeoient, abusans de l'autorité de son nom pour destruire la verité de la parole qu'il nous auoit donnée. Lui faire

entendre l'vrgente necessité de nos iustes plaintes. Le requerrir en toute humilité qu'il luy pleust deliurer nos Eglises de tant d'allarmes & d'espouuantemens dont elles se voyoient de tous costez enceintes. En somme se monstrier nostre protecteur contre vne si violente oppression qui nous est faicte par tout son Royaume au preiudice de l'autorité de ses Edicts, & contre les menaces ouuertes de nostre ruine, que l'exemple des maux du Bearn rendoient si formidables. Mais nous trouuons que nos ennemis auoient bousché les oreilles de sa M. à toutes nos requestes, qui sont reiettees sans qu'on vueille rien receuoir ny entendre de nostre part. Et en mesme temps on procede dans les Parlemens & Bailliages criminellement contre nous. On menace ceste ville & nous de guerre ouuerte comme rebelles & seditieux.

Or là dessus iugeans par l'experience du passé, & à la methode de nos ennemis, en laquelle nostre dommage ne nous auoit desia rendus que trop sçauans & experimentez, que ceste accusation & ces menaces se faisoient pour authoriser vn refus & desni de iustice, & nous faire perdre toute esperance de rien obtenir à l'aduenir en nos plus iustes & necessaires plaintes, nous insistons à plusieurs fois en la iustification de nostre innocence, & perséuerons à supplier, & à ietter aux pieds de sa M. nos tres-humbles requestes. Mais comme tout accez nous est interdit, & que pour charger nostre procedure de haine, mesmes à l'endroit des nostres, & pour faire naistre des diuisions parmi nos Eglises, nos ennemis faisoient donner quelques paroles à nos Deputez generaux & à plusieurs autres d'entre nous, que le Roy, resolu de ne rien ouyr de nostre part, vouloit neantmoins traiter fauorablement ses subiects de la Religion & leur rendre iustice. Qu'il entendroit volontiers leurs plaintes par les De-

putez generaux & sous le nom des Eglises. Pour experimenter quel effect auroient ces paroles, nous intermettons toute poursuite en nostre nom, & nous retenons dans le silence, la remettons entiere à nos Deputez generaux pour la faire en leur nom & au nom des Eglises. Et certainement nous ne craindrons point d'adiouster que si l'estat de nos maux croissans de iour en iour, & menaçans de pis, n'eust accru nostre apprehension & nostre iuste defiance, vaincus de tant de chagrin, de rebuts, de menaces, & de desespoir de tout succez, nous n'aurions eu plus grand desir que de nous retirer, & peut estre que nos Eglises ne l'eussent improuué. Mais en mesme temps la fraude de nos ennemis s'est descouuerte plus auant, & la persecution proiettee contre nous, esclattant en diuers endroits a manifesté leur dessein par tant de perfidies & de violences, qu'estans maintenant obligez pour la iustification de nostre innocence & de nostre defense legitime cōtre la guerre qu'ils nous font, d'estaller icy leur procedure aux yeux de tout le monde, nous dotterions pour l'honneur de la France de publier des faits si odeux, si en mesme temps on ne recognoissoit que ceux qui en sont autheurs, sont ses vrais ennemis, & ont coniuré la ruine avec la nostre.

Premieremēt sous l'apparence de ces belles promesses, que le Roy vouloit entretenir les Edicts faits en faueur de ses subiects de la Religion, & leur donner contentement sur leurs plaintes des contrauentions faictes à iceux, on attire à la Cour Monsieur le Duc de Lesdiguieres par l'esperance que son entremise contribueroit à obtenir ce contentement, & sous ceste mesme assurance on entretient tous les autres Seigneurs qui sont parmi nous, & les personnes plus considerables. Cependant en mesme temps Monsieur de Montmorencilleue les armes

contre nous en Languedoc, & apres plusieurs actes d'hostilité commis, attaque Villeneuve de Berg que nous tenions en Viuaréz. Et comme il estoit aisé à preuoir que ceste violence trouueroit de l'opposition, on y enuoye de la Cour le sieur de Reaux Lieutenant des gardes du corps, portant en apparence commandement de faire desarmer tout ce qu'il trouueroit armé. Monsieur de Chastillō (de qui la prudence & l'affection au seruice du Roy & à la paix de son Royaume, auoit retenu iusques-là l'impatience des peuples, desireux de repousser la force qui leur estoit faicte) ayant esté aduertit la charge dudit sieur de Reaux par vn Archer qu'il luy enuoya, continuë d'arrester l'esmotion des nostres & comme il attend des nouvelles plus particulieres dudit sieur de Reaux & de l'obeyssance de Monsieur de Montmorency au commandement qu'il portoit, Villeneuve de Berg qui auoit desia repoussé deux escalades & tous les efforts qui auoient esté faits à la porte, s'estant renduë au seul nom du Roy, entre les mains dudit sieur de Reaux, & soubmise à sa protection & sauuegarde, Monsieur de Montmorency y estant entré y establit garnison, qui à l'instant mesme y commit toutes sortes d'excez & d'outrages. Sur ce, les nostres ayans esté induits à s'armer pour la defiance de telles fraudes, & pour la necessité de leur defence, le sieur de Reaux estant venu trouuer Monsieur de Chastillon, & sous l'assurance qu'il luy donne que Villeneuve de Berg seroit renduë, & par l'esperance que selon les conuentions du traitté accordé entr'eux toutes choses seroient restablies en paix, ayant obtenu qu'il desarmeroit ainsi qu'il y satisfaisoit de bonne foy, Monsieur de Montmorency au lieu d'y obeyr de sa part, loge cinq ou six compagnies dedans Villeneuve de Berg, & y fait proclamer à son de tambour le sieur de Perault pour gouuer-

neur, & de plus ayant deliuré plusieurs nouvelles commissions, dattees du lendemain que ledit sieur de Reaux estoit arriué aupres de luy, il assiege Vals autre place de Viualets, tenuë par les nostres, où mesme ledit sieur de Reaux, cependât que Monsieur de Chastillon se reposoit sur sa parole, de faire accomplir le traicté à M. de Montmorency, assistoit luy mesme en personne & estoit spectateur de la batterie. Ceste place petite & foible n'ayant rien que ses habitans apres auoir enduré cent coups de canon, s'estant renduë à composition honorable, contre la capitulation expresse, toutes sortes de cruautez, violences & barbaries y ont esté exercees sur vne infinité de pauvres personnes innocentes cruellement meurtries ou violees. Et contre la foy du mesme traicté, le semblable a esté encore fait en suite à Valons autre place voisine. Ces fraudes & contrauentions aux traitez simulez manifestent à tous que la parole du Roy & son commandement apparent n'ont esté employez que pour seruir de piege à nostre bonne foy & pour donner occasion, sous vn adueu tacite de tout ce que Monsieur de Montmorency feroit au contraire, à nous faire perdre ces places.

En mesme temps encore le sieur de Poyane s'estant fortifié dans le Bearn pour en chasser Monsieur de la Force, on enuoye de la part du Roy le sieur de la Saladic à Monsieur de la Force, pour luy faire commandement de congедier quelques troupes qu'il tenoit pres de luy pour sa seureté, & pour maintenir l'autorité du Roy en sa charge au gouuernement du pays, contre les entreprises violentes dudit sieur de Poyane. Mais ledit sieur de la Saladic au lieu de remporter la responce de Monsieur de la Force au Roy, comme il faisoit semblant, est allé par la Guyenne porter commandement d'armer à Messieurs d'Espérnon, de Vignoles & à plusieurs autres,

d'où nous auons veu à l'instant toute la Guyenne remplie d'armes, outre celles qui y'auoient esté auparauant laissées.

D'autre costé nous auons veu en ce mesme instant les troupes laissées dans le Poictou s'auoisiner des enuiron de ceste ville, & de S. Iean d'Angely. Et par vn Arrest du Conseil tous les Bureaux des receptes transferez de toutes les places de nostre seureté où ils estoient establis; Argument sensible, qu'encore que la seule ville de la Rochelle fust menassée, on en vouloit neantmoins à toutes les autres, & d'un dessein de guerre generale contre nous formé & proche; Ceste translation ne se faisant pour autre cause que pour nous oster le moyen, la persecution ja resoluë suruenant, de nous ayder de ces commoditez pour nostre defence, preuue par consequent qu'on se preparoit de nous y reduire.

Or cōme par ces alterations nouuelles à nostre repos, ces menaces, l'oppression & la persecution ouuerte en tant de lieux, nous preuoyions assez l'orage qui nous panchoit sur la teste & prest à esclatter, recognoissans encore que nos ennemis enflés du succez rencontré au rauage & desolation de Bearn n'auoient attendu depuis, que la saison commode de continuer nostre ruine par vne guerre ouuerte, ayans de cela prou d'enseignemens par les propos qu'on auoit tenu ouuertement, au retour du Bearn, du siege de la Rochelle, des moyens & de la facilité de la prendre. Par les discours qu'à toutes heures on tenoit au Roy de la ruine des Huguenots. Par les calomnies qu'on nous suscitoit pour en auoir pretexte, par les menaces que nous en entendions, & par les ap-
prets qui s'en faisoient visiblement. Neantmoins sous les paroles qu'on donnoit de la bonne volonté du Roy enuers ses suiets de la Religio & à l'autorité de ses Edits,
nos

nos Deputes generaux à l'entremise desquels toute la poursuite estoit remise, presentement à sa Majesté vn cahier de plaintes pour auoir reparation sur quelques griefs des plus importants, & d'vne plus prompte & necessaire execution pour le repos & la seureté de nos Eglises.

Mais apres plusieurs instances & remises, apres diuerses sollicitations & prieres de tous ceux qui tiennent les premiers rangs entre nous, mesme de Monsieur le Duc de Lesdiguières present à la Court, nos Deputez generaux n'ont iamais peu obtenir aucune response. Seulement Monsieur de Fabas l'vn d'iceux, & vn Gentilhomme de la part de Monsieur le Duc de Lesdiguières estant venu vers nous, & nous ayans fait entendre conformément à vn escrit de Mondict sieur de Lesdiguières signé de sa main. Que pour tout contentement sur tant de plaintes, Monsieur le Duc de Lesdiguières se promettoit (car le Roy, quoy qu'on fist esperer à nos Eglises qu'il vouloit entretenir, ses Edicts, ne donnoit pas mesme icy sa parole ny de sa bouche ny par aucun ministre de l'Estat) que moyennant nostre separation prealablement effectuee, on obtiendrait la retraite des troupes des lieux où elles nous donnoient quelque defiance. Que l'Estat des places de Dauphiné seroit cherché pour nous estre deliuré dans six mois au cas qu'il se trouuast. Qu'il seroit pourueu pour ceux de Bearn au remplacement des derniers accordez au lieu des reuenus Ecclesiastiques. Que Monsieur de la Force & ses enfans seroient laissez en leurs charges. Et au surplus que parole tres assuree luy auoit esté donnee que rien ne seroit entrepris, attendant le temps qu'il conuiendrait pour auoir nos resolutions. Mais comme nous vaquions à icelle nous eulmes aduis par Monsieur Chalas, l'autre de nos Deputez ge-

neraux , que le lendemain & contre lesdictes promesses nos ennemis auoient porté le Roy à resoudre absolument & ouuertement la guerre contre nous. Et à faire le departement d'une armee de quarante & vn mille hommes de pied & de six mille cheuaux. Et que la charge de Monsieur de la Force du gouuernement de Bearn auoit esté donnee à Monsieur le Mareschal de Themines, & celle de Capitaine des Gardes qu'auoit Monsieur le Marquis de la Force son fils, donnee à Monsieur le Marquis de Mauny , & que Monsieur de Monpoüillan vn autre de ses fils auoit eu commandement de se retirer de la Cour.

En ce mesme temps comme nos ennemis hastoient nostre persecution par toutes sortes de moyens, les predications seditieuses, l'instruction des confessions, les libelles diffamatoires, les calomnies & impostures contre nostre fidelité, l'impression de la haine du Roy contre nostre Religion, & les declarations de guerre publiees contre nous produisant leur effect, est arriué en la ville de Tours, le 19. d'April qu'un nommé Martin le Noir peu auparauant conuerty à nostre religion, pour raison dequoy il auoit souffert plusieurs iniures & conuices, iusques là que le peuple ayant fait vne effigie de paille, & l'appellans tantost de son nom, tantost de Martin Luther, l'auoit publiquement bruslee, sans qu'on ait iamais peu obtenir iustice d'une insolence si outrageuse: estant lors decedé ainsi qu'on le portoit en terre, le peuple s'estant mutiné apres seui sur son corps & ceux qui le portoient au sepulchre, apres auoir commis toutes sortes d'indignitez & d'inhumanitez au deterrement d'iceluy, cherchant à faire pis, esmeut vne plus violente sedition, & ayant abbattu & demoly vne maison proche du cimetiere, court au Temple esloigné de là d'un quart de

lieuë, y met le feu, entre dans la maison du concierge, la pille & la saccage, & estant accreu iusqu'au nombre d'une effroyable multitude, demeure trois iours entiers à continuer l'embrasement & la demolition du Temple sans que le Magistrat y interuint, ou qu'y interuenant trop tard il ait peu suffire à reprimer vne violence si enragée. De là l'exemple de ceste sedition passe incontînēt en la ville de Poictiers, où le peuple poussé de pareille fureur a demoly de fonds en comble les murailles du cimetiere où ceux de la Religion enterrent leurs morts, rompu & brisé toutes les tumbes, & prest à commettre vne semblable violence contre le Temple, si le Magistrat plus soigneux n'en eust arresté le cours.

Or toute la suite des conseils & des actions de nos ennemis iusques-là, & principalement ces funestes & espouuantables esclandres, ces grâds preparatifs de guerre, l'iniuste & rigoureux traitement fait sans cause à Monsieur de la Force & à ses enfans, contre les assurances tout fraichement donnees du contraire, avec les armes toutes prestes sous le commandement de Monsieur d'Espernon pour l'inuasion de Bearn, tesmoignoient & donnoient assez à cōnoistre que l'heure d'une persecution generale estoit venue, & que le dessein ia long temps formé de nostre ruine estoit esclos. Pour ceste cause nos ennemis, à fin que leur perfidie peust iouïr leur ieu & faire son effort, font promettre d'un costé que le Roy feroit faire iustice de la sedition de Tours, & à fin de leuer ailleurs les deffiances, ou pour endormir les plus confidens, font verifier en tous les Parlemens vne Declaratiō du 27. d'Auril, portant que le Roy voulant chastier quelques vns de ses suiets de la Religion (qu'on appelle rebelles & seditieux) vouloit & promettoit d'entretenir ses Edicts à tous ceux qui demeureroient en son obeis-

fance, les maintenir & conseruer en toute liberté & seureté, suiuant le contenu des Edicts. Et finalement font donner assurance à Monsieur de la Force, que quittant le Bearn, & en donnant aduis à Monsieur d'Espernon, on luy feroit commandement de se retirer. Or voicy quel a esté l'effet de ses promesses. Nous commencerons par le dernier chef qui a esté le premier violé. Monsieur de la Force s'estant retiré, & ayant donné aduis à Monsieur d'Espernon de son desarmement & de sa retraite par le sieur Baron d'Airos, incontinent apres Monsieur d'Espernon est entré avec son armee dans le pays, s'est saisi de toutes les villes & places où ceux de nostre Religion estoient en plus grand nombre, les a remplies de fortes garnisons, razé le Chasteau de Montanay, & réduit tous les nostres à vn si deplorable estat, que la plus part, voire les principaux ont esté contraints de s'enfuir, d'abandonner leurs biens & leur pays, avec meurtre de plusieurs personnes desarmees & sans defense, & les autres demeurent à present retenus sous vne miserable seruitude, souffrans toutes sortes d'iniures & de cruantez. D'autre costé le Roy s'aduancant pour l'exécution des menaces publiees contre ceste ville, apres auoir respandu par toutes assurances, qu'il n'en vouloit point au general de ceux de nostre Religion, & donné particulieres promesses aux gouuerneurs de quelques places de nostre seureté, qu'entrant en icelles il n'y innoueroit rien, Ayant passé par Tours où la sedition s'estant renforcee, & le Commissaire enuoyé pour l'exécution de la iustice, chassé dehors, les prisonniers tirez des prisons par violence, les maisons des nostres (qui par l'effroy du premier tumulte s'estoient retirez) pillées & saccagees, à peine la seule reuerence du Roy violée a esté expiée par le supplice de cinq miserables belistres. Et cela encore pour entretenir

la credulité de ceux qu'on voudroit repaistre d'opinion, que l'entretènement des Edicts seroit continué. Sa Majesté est venue à Saumur où Monsieur du Pleffis, sous les promesses expressees qu'on luy auoit donnees, que rien ne seroit changé au gouvernement, & sous la foy de la Declaration publiee trois semaines auparauant, ayant ouuert les portes de la ville & du Chasteau au Roy, a faict l'essay à nostre grand dommage, des fraudes & perfidies de nos ennemis, qui ont induit le Roy à luy oster le gouvernement, & à mettre vne garnison de 400. soldats de ses gardes dans le Chasteau, & vn autre dans le fauxbourg de la Croix verte, & par ce moyen nous faire perdre ceste place de seureté. Avec quelle horreur & indignation toute la France peut elle voir que les ennemis de son repos & du seruice du Roy, abusent ainsi perfidement de son nom & de sa parole, pour commettre des desloyautez si detestables? Il ny a que dix mois que par breuet expres de sa Majesté, la garde des places de seureté nous a esté continuée pour quatre ans. Entre toutes, la ville de Saumur estoit vne des plus importâtes à nostre seureté. Elle estoit en nos mains depuis que le feu Roy estat Roy de Nauarre appellé par le Roy Henry III. à son secours, vint suivi de ceux de nostre Religio, pour le deliurer de la captiuité & de la tyrânie de la Ligue, on luy dōna ceste ville pour le passage, & elle demeura dès lors en nos mains pour marque de nos bōs seruices, & de nostre fidelité à ceste Couronne. Ceste place sise sur la Loire estoit pour nous seruir, aux persecutions & aux confusions que les ennemis de cet Estat esmeuent ruïourd'huy, de retraite ou de passage commode à tant de pauures troupeaux descouverts, pour se sauuer de la furie des feux ou des glaïues qu'on leur prepare. Ceste ville durât le repos des années passees a serui de pepiniere à nos Eglises, & estoit le lo-

gis d'une Academie assez florissante. Pour ces causes la cruauté de nos ennemis a poussé le Roy à nous commencer la guerre en laquelle ils le precipitent contre nous, par vne playe si cuisante, que pour nous faire, avec plus de facilité, toutes les calomnies precedâtes, tous les pretexts de desobeissance & rebellion, toutes les Declarations particulieres contre nostre Assemblée & ceste ville, toutes les Declarations & promesses frauduleuses en faueur de ceux qui demureroyent en l'obeyssance du Roy ont esté employees. Car pourroit on bien dire que Monsieur du Plessis, de qui personne n'ignore les longs & fideles seruices rendus au feu Roy & à sa Majesté à present regnante, ait commis quelque desobeissance & rebellion, Ains n'auoit-il pas mesmes passé toute mesure de confiance en la desloyauté de nos ennemis pour le respect du seul nom du Roy? Et estimant destourner de dessus sa teste l'orage duquel il voyoit vne partie des nostres ouuertement menacez, auoit luy mesme publié le benefice de ceste trompeuse Declaration, & pour en faire la premiere espreuue ouuert au Roy avec tant de confiance les portes de la ville. Aussi le masque leué en cest endroit, on n'a plus fait de doute de monstrer qu'on en veut à tout le general. Car aussi tost que le Roy a esté à Saumur on a eu nouuelles du desarmement qui s'est fait de tous ceux de la Religion par toutes les principales villes de la Normandie & d'ailleurs. Ceux-là estoient-ils aussi criminels, ou depuis la Declaration ont-ils commis rebellion ou desobeissance? qui plus est comme le Roy estoit à Saumur, le sieur Arnaut est allé à S. Iean d'Angely le iour de Samedy 15. du present, portant commandement à Monsieur le Duc de Rohan & à Monsieur de Soubize d'aller trouuer sa Majesté, comme desirant auoir leur aduis pour vn accommodement des af

faïres presentes. Ceci se faisoit à deux fins. L'une, afin que pour l'esperance de quelque iustice, les grands & les peuples de nostre Religion fussent retenus comme ils ont esté iusques à present, tandis qu'on diligenoit de toutes parts contre nous les preparatifs de la guerre. L'autre principale & plus proche, pour couvrir la defiance ou le soupçon des troupes du Roy conduittes par Monsieur d'Auriac, qui le lendemain s'estant ietté dans les faubourgs de S. Iean avec trois mille cinq cens hommes at-
 aqua la ville & fit effort iusques dedans les portes pour y entrer & la surprendre d'assaut s'il n'y eust trouué resistance. Ceste ville estoit-elle criminelle? la pouuoit-elle estre que ces Seigneurs ne le fussent? Et cependant le Roy escrit à Monsieur le Duc de Rohan comme le recognoissant fidele & affectionné à son seruice & Gouverneur & son Lieutenant en la Prouince du Poitou, ce qui ne se feroit pas à vn rebelle & desobeyssant. Quel autre crime a donc commis ceste ville pour estre inuestie & menacee de siege, & reduitte comme elle est à present, à attendre deuant ses murailles le canon du Roy & son armee qui s'auance en diligence pour l'assiéger? Quel crime a commis encore la ville de largeau & autres places de seureté, qui en mesme temps ont esté inuesties & surprises, autre que le crime qu'on a iuré de ne nous pardonner pas? que la haine de nostre Religion dont ils ont coniuré la ruine?

C'est ce que nous proposons deuant les yeux de tous les François, & non seulement d'eux, mais de tous les Chrestiens que nous appellons icy pour iuges de nostre innocence, & de la violente persecution que nous souffrons iniustement. Et encore que le precedent recit veritable des procedures de nos ennemis contre nous, & des nostres enuers nostre Roy, donne assez à cognoistre la

calomnie de l'accusation par laquelle ils nous publient rebelles & desobeissans, toutesfois pour ne laisser aucun ombrage qui puisse alier de nous la faueur du iugemēt equitable des gens de bien, leur compassion de nos miseres: & leur secours, du besoin de nostre defense necessaire & iuste: il nous est aisé de faire voir qu'il n'y a en nous ny soupçon ny apparance du crime de rebellion qu'ils nous imposent. Ia à Dieu ne plaise qu'aucun estime que les plaintes, que la violence de l'oppression extorque de nous, regardent nostre Roy, auquel nous recognoissons & reuerons de tout nostre cœur l'image de Dieu icy bas. Mais si reietans sur ceux qui abusent de ses affections & de sa conscience l'iniustice dont nous nous plaignons, nous voulions dire quels eux-mesmes sont qui nous accusent, toute la France, qui gemit opprimee sous l'insupportable faix de leur tyrannie, tesmoigneroit pour nous que nous ne le dirōs point par reclamation ny par calomnie. Mais il suffira pour nostre innocence de nous purger de l'accusation. Or ils nous accusent d'estre rebelles & desobeissans, & de heurter contre l'autorité du Roy. Graces à Dieu la religion que nous auons au cœur, & que nous auons declaree par vne solennelle Confession presentee à nos Roys pour leur tesmoigner avec la pureté du seruice que nous rendōs à Dieu, nostre sincerité à leur obeissance, nous a ia long temps deschargez de ce blasme. Nous ne recognoissons aucune puissance en terre superieure à celle de nostre Roy. Nous n'auons point de serment à d'autre. Nous detestons toute doctrine qui enseigne que directement ou indirectement nous puissions estre desliez de celuy que nous auons iuré à son obeissance. Et à la profession sainte de ces enseignemens se rapportent aussi toutes les actions & de nos peres & de nous. Où s'est-il trouué d'entre nous,

qui

qui ait trempé le cousteau detestable dans le sang de nos Roys, qui ait ioint son glaiue à celuy de l'ennemy de la France pour deschirer ses entrailles? Ains apres tant de mortelles playes qu'elle en a receu cy deuant, Dieu s'est-il pas serui des bras de nos peres pour ayder à la releuer comme du tombeau? Et aujourd'huy que la mesme con- iuration se renouë, que ceux qui ont iuré haine mortelle à nostre Religion, & par vne esgale fureur se sont deuouëz à la ruine & destruction de tous les Estats de la Chrestienté, & particulièrement de ceste Monarchie, tenans le cœur & les volonteiz du Roy comme en leurs mains, dependantes des suggestions qu'ils font à sa conscience, l'induisent à mettre son-Estat en hazard pour nous perdre: nous osons dire que le temps & l'experience luy feront encore recognoistre qu'il n'a rien de plus ferme en son Royaume pour l'appuy de sa Couronne que nostre fidelité. Et certainement il n'est rien de plus exposé aux yeux de tous ceux qui nous considerent, que de recognoistre que les interets de nostre conseruation sont inseparablement attachez au repos & à la paix de ceste Couronne, & à l'affermissement de l'autorité de nostre Prince. Il est indubitable que selon les moyens humains dont Dieu se sert pour l'auancement de son œuvre, la conseruation & accroissement de nostre Religion en ce Royaume, dependent de la liberté & seureté des Edicts sous lesquels nous viuons; l'entretien des Edicts, de l'autorité absoluë du Roy. Telsmoin en soit le Regne heureux de Henry le Grand, lequel comme Dieu eust esleué en puissance & autorité absoluë plus qu'aucun des Roys de la Chrestienté, aussi auons nous veu lors sous la prosperité & grandeur de ceste Monarchie nos Eglises fleurir & se replanter avec tant de succez, que nos ennemis en creuans de despit n'ont cessé

iufqu'à ce qu'ils ayent perfidement raiui à la France ce Roy fi absolu. Et encore auiourd'huy que pour pretexte de nous courir sus & faire la guerre à nostre Religion, ils nous ont accusez de desobeyfiance, auons nous fait autre chose que de nous plaindre de l'autorité du Roy & de ses Edicts violez, & d'en demander le reftabliffement? Et en celay a-il quelque ombrage de rebellion contre nostre Prince? Nous nous fommes assemblez pour luy demander iustice. Manquions nous de neceffité ou de droict de le faire? Nous l'auons cy dessus iustifié par l'estat de nos maux, & la qualité des promesses qu'on nous auoit donnees. Auons nous outrepassé les loix de la plainte? Si refusez nous auons recouru plusieurs fois, & plusieurs fois essayé de ietter nos tres-humbles requestes aux pieds de nostre Roy. Hé! qui peut trouuer mauuais ou blasmer que nous facions enuers nostre Roy, image de Dieu en terre, ce que Dieu nous commande que nous facions vers luy? Et pour estre demeurez ensemble plusieurs Deputez de toutes les Prouinces, infiftans de remporter de la grace du Roy l'effect de ses bonnes volontez enuers nous, est-ce point vne maligne & iniurieuse chicannerie, que pour authoriser vn desny de iustice, on nous accuse de donner ombrage à l'autorité du Roy? Et pour vn specieux exemple du refus qu'on nous fait, on allegue que les Estats apres la presentation de leurs cahiers se retirent sans attendre la responce. Mais qu'auons nous de commun avec des Estats? toutes nos demandes font particulieres. Nous ne demandons pas de faire des reglemens dans l'Estat, ou de nouvelles ordonnances, en quoy certainement l'anthorité Monarchique seroit diminuee ou partagee, si les Estats y contribuoyent autrement que par leurs aduis. Mais tout ce que nous demandons est, que des Temples bruslez nous soient reparez

que l'exercice de nostre Religion nous soit restably, que des villes ostees de nos mains, en la garde desquels le Roy les a commises nous soient restituees. Que des officiers soient receus. Des enfans arrachez par force des bras de leurs peres leurs soient rendus, & autres choses semblables. En quoy l'autorité du Roy est-elle bleffee, s'il nous octroye sur le champ que iustice en soit faite? Si le particulier à qui l'iniure est faite en peut iustement demander & attendre iustice du Roy, pourquoy si l'iniure est faite en haine du public, au public ne sera-il pas permis le mesme? Ainsi y a-il rien de plus inique que de nous auoir accusez de rebellion & de desobeissance pour nous estre plaints, & pour auoir demandé iustice en ceste sorte? rien de plus cruel que de nous persecuter pour ceste cause, & nous faire la guerre? Mais c'est assez pour reconnoistre que les pretextes recherchez par nos ennemis sont artifices colorez pour executer le dessein de long temps coniuré de faire la guerre à nostre Religion, & de ietter la France en confusion & en trouble.

Partant si on considere la iustice & la necessité presente que nous auons eu de recourir par nos plaintes à la protection du Roy. Le droit & la permission qui nous auoit esté octroyee de nous rassembler pour ce faire par des paroles si expresses & si solennelles. Le manquement & la contrauention aux promesses interuenu par la fraude de nos ennemis. Leur violence à nous empescher l'accez vers la Majesté de nostre Prince & à faire ietter toutes nos requestes. L'iniustice de leur accusation, & le crime calomnieux de rebellion qu'ils nous imposent. Si on considere la desloyauté de leur procedure tādīs qu'ils temporisent sur le refus de nous faire iustice; pour nous oster trois villes à la fois en Viuarez sur la fraude d'un traitté, & par la rupture de la foy publicque. Enuahir tout

le pays de Bearn contre vne stipulation si expresse & si pleinement accomplie de nostre part. Puis apres y commettre des actes d'hostilité si sanglans & si inhumains. Et finalement si on considere vne perfidie si infame, que sous la couuerture d'une Declaration authorisee du sacré nom du Roy, & verifiee dans tous les Parlemens de France, promettant seureté & liberté sous l'entretien des Edicts à tous ceux de la Religion qui demeureroient en obeissance, on se soit emparé de Saumur ou avec tant d'obeissance & de respect les portes ont esté ouuertes, sous des promesses expresses & particulieres, (outre la foy publique de la Declaration) que rien ny seroit innoué. Que par vne mesme fraude & trahison la ville de Iargeau & autres places de seureté au mesme temps ont esté enuahies, celle de S. Iean attaquée, & maintenant en l'attente d'une desolation entiere. Tous ceux de la Religion desarmez par toutes les principales villes de Normandie & d'ailleurs, pour les apprestier, hélas! à vne plus facile boucherie à laquelle ils sont exposez. Si on considere, disons-nous, toutes ces choses ensemble, nous ne doutons nullement qu'on ne recognoisse que nous souffrons ceste persecution pour iustice, & en haine de nostre Religion, qu'une coniuration vniuerselle par toute l'Europe menace auiourd'huy de destruire.

Pourtant estant reduits pour la liberté de nos consciences, & pour les affections de nostre patrie de chercher en nous mesmes, & vers les amis de nostre Religion & de cest Estat, vne iuste & necessaire deffence. Nous nous adressons encore ici avec larmes à NOSTRE ROY, le supplians en toute humilité considerer & croire, que les vœux & plus ardans desirs, que nous espondons continuellement vers Dieu en nos prieres, sont pour la prosperité de sa personne, & de son Estat. Et qu'il se souvien-

ne que nos peres, enseignez par leur Religion à la vraye obeyssance deuë à leur Roy, ont abandonné le soin de leurs propres vies, pour rendre vtils & fructueux le soin & les labeurs de Henry le Grand, & contribuer à la reconqueste de ce Royaume perfidement vendu & mis en proye à ses ennemis, par les mesmes pretextes de haine & de persecution contre nostre Religion & nous. Et que par là il entende que nous suiuanz l'exemple de nos peres, heritiers de leurs affections, n'auons iamais abandonné le deuoir de nostre naissance, ny refusé la vraye obeyssance, & le prompt seruice que nostre Religion nous apprend à luy redre. Et que pleust à Dieu, SIRE, que V. M. poussée des vrais interests de sa grandeur, & du mouuement naturel de sa generosité, voulut pour l'affermissement de sa Couronne, & dignité de son Royaume, tourner ses armes contre les ennemis de son Estat, & se seruir de nostre fidelité en la deffence d'une telle cause.

Nous ne craindrons pas de dire de nous qu'en vne si glorieuse emulation d'entre vos meilleurs subiects, la palme n'en demeureroit point à d'autres. Mais nous disons maintenant & pleurons avec larmes de sang, & en amertume de sanglots qui deschirent nos entrailles, que les ennemis de vostre Couronne & de vostre personne, SIRE, vous ayans induit à employer vos armes cōtre nous, & à les tremper au sang de vos plus fideles subiects, veulent perdre & vostre Couronne & vostre personne tout ensemble. Ce sont vos vrais ennemis qui allument vostre haine contre nous, pour en embraser vostre Estat, & vous enseuelir en ses ruines. Qui ayans cruellemēt meurtre le plus grand Roy du monde vostre glorieux Pere, parce qu'il ne nous haysoit pas, & que sa bonté & sa iustice nous protegeoit comme ses fideles subiects: induisent auourd'huy vostre Majesté à nous hayr & à nous

destruire, pour l'accabler elle mesme sous la cheute de ceste Monarchie. Que si dans cest orage qu'ils ont desia excité, & que nous sentons fondre sur nous, nous sommes contrains pour nostre propre deffence & conseruation de recourir aux remedes naturels: Nous protestons, SIRE, deuant Dieu, deuant vous, & deuant tous les hommes, que nostre intention est de conseruer tousiours vostre autorité & le respect de vostre obeyssance au milieu de nous, & que nous ferons tous nos efforts possibles pour sauuer de peril vostre personne & vostre Royaume. Veuille le Tout-puissant, qui est le Dieu de vengeance & de grace, & qui selon les decrets de son conseil, tantost a fait tomber son ire en diuers exemples d'horreur sur les testes des Grands & des peuples mutinez contre luy, tantost a preserué & conuertí à soy les plus animez contre son Eglise, vous donner, selon nos vœux, que garanti de tous dangers, vous puissiez recognoistre la Religion & la fidelité des personnes que vous hayssiez maintenant, sans les cognoistre. Cependant nous appellons ici par nos tres-humbles supplications tous les Rois, Princes & Estats interessez en l'innocence de bons & fideles subiects opprimez, mais principalemēt obligez enuers Dieu à la defense de sa cause & de sa vérité; Et les requerons d'appuyer de leur secours & de leur assistance la foible deffense que nous opposons par necessité à tant de forces puissantes de nos ennemis, qui ayant choisi ce temps expres, apres qu'ils ont allumé le feu dans la plus part des Estats, d'où ils estiment que nous eussions peu attendre secours, pensent nous opprimer maintenant avec plus de facilité. Mais nostre confiance principale est aupres du Tout-puissant, qui renuerse les desseins des nations, & souffle sur l'entreprise des peuples coniurez contre son Israël. Et puis que pour la gloire de son Nom

nous sommes hays, & que pour renuerfer la verité on
cherche nostre ruine, nous nous asseurons qu'il nous fera
sentir la mesme deliurance que nos peres ont esprouué
de son secours, que nous inuoquons du profond de nos
ames. Dieu ne te tien point coy, ne te tay point, & ne te repose plus
ô Dieu! car voicy tes ennemis bruyent, & ceux qui te hayssent ont
leuë la teste.

*C'est la Declaration des Eglises Reformees
de France & Souueraineté de Bearn par leurs
Deputez assemblez à la Rochelle. Et pour tous.*

COMBORT,
BANAGE,
RODIL,
RIFFAVT,

President,
Adioinct,
Secretaire,
Secretaire,

